

四庫全書

集部

欽定四庫全書

集部

蘇魏公文集卷

四十二

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遂

謄錄監生臣施華

欽定四庫全書

蘇魏公文集卷四十

宋 蘇頌 撰

表

謝翰林學士承旨

臣某言今日東頭供奉官充待詔董士隆至臣所居
奉宣聖旨召臣入院充學士承旨者綸出王言擢預內
廷之直星馳使指頓生陋巷之光惴栗於中彷徨靡措

伏以禁班親近莫如學士之榮密命對敎更優承旨之貴自元和之置職逮聖世之右文常擇有年德可任用之人使專大號令興廢置之事時則有若趙公之多聞博洽鄭綱之小心兢謙崔羣識明治亂之分李絳言為國家之利入贊基宥上副聖情乃如昧陋不肖之倫豈稱疇咨曰俞之命伏念臣稟生不厚操術無奇姑緣門業之傳預數文林之末歷四朝之久浸塵簪橐之聯荷二聖之知置于喉舌之地以天官掌選之重兼金華進

讀之員內省至愚最為孤立每自憐於介特況已迫於
衰遲向祈辭劇而引年再被發中之賜詔復遷延于省
部實出優容雖勉強于簿書愈深惕厲豈謂伏蒙皇帝
陛下矜憐孤直曲賜生成因圖任于舊人俾奉行于別
旨望複門之秘邃恍若神遊念繼世之遭逢重為榮遇
惟先臣之昔仕被仁祖之深知再踐禁林常承于晝訪
屢陳讜議每見於褒稱愴徂歲之如流偶遺孤之未殞
逮此非常之寵復叨采厚之恩對捧紫泥感極而繼之

以泣仰酬渥澤力殫而豈敢愛生惟當夙夜在公靖共爾位視甄花而直入始務恪勤問溫木而不言益思愍慎自餘謹職業之守罄傾輸之誠知無不為死而後已臣無任

又

臣某言今日東頭供奉官充待詔董士隆至臣所居奉宣聖旨召臣入院充學士承旨者內廷進職方拜于綸函使駟臨門復膺于召節恭聆宣語益集汗顏伏以

王者之言出為大號令學士之職入與上謨謀故李肇
謂樞機之慎微執誼以刀筆為餘事矧惟承旨之貴預
聞密畫之先職雖清閒事實要重往當茲選未易其人
必也忠言嘉謨可以動中于幾會隻簡片削可以風行
于邇遐見於事功乃為宜稱如臣者學如涉水愚甚
株偶傳業于箕裘幸繼榮于軒冕越自仁皇之在御獲
叅東觀之讎書周旋衆務之間歷更臺閣叨被兩宮之
眷擢在省曹自司寇之祥刑領天官之大選三經歲序

慚無吏課之優再荷帝俞入備經闈之侍而臣衰年已暮孤立于時嘗陳告老之誠未許容躬而去銓衡務重久任則鑒裁易疲犬馬齒衰勉強則顛躓是懼豈謂伏蒙太皇太后陛下如天之無不覆用人而不求全眷履歷之最深雖耄昏而不棄深嚴禁路蒙非次之優遷密勿邇言俾居中而專受因對時之異渥動追往之至懷言念先臣嘗更是職相望四紀顧陳迹以猶存再踐複門愴遺孤之已老永思榮遇益念教忠固當佩服訓辭

勤修素業如或使定禁中之詔草當竭見聞固不敢恃
天子之私人輒踰分守誓堅此志論報畢生臣無任

謝入院襲衣鞍馬等

臣某言伏蒙聖慈以臣入院特賜衣一對腰帶一條金
鍍銀鞍轡馬一匹者仰對頒宣內深愧畏竊以給五時
之服自漢已然賜三花之驄在唐為貴況復佩金校鈎
環之飾乘具裝釘轡之華皆所以著朝廷之采章異名
器之等級茂惟聖世優待從官方內庭進拜之初有上

日對敎之寵自非才傑曷稱恩輝而臣誤被咨俞顧承
密命始踐朝門之禁遽叨內式之頒袍帶橫金已集曳
婁之誚鞍馬照地兼貽負乘之羞此蓋伏遇皇帝陛下
甄別賢能憫憐耆舊擢繼世官之美優加異數之褒思
報上知誓殫晚節臣無任

又

臣某言伏蒙聖慈以臣入院特賜衣一對腰帶一條金
鍍銀鞍轡馬一匹者賜予優隆愧惶增積中謝竊以禁

林就職占謝在廷禮式循名加賜于下便蕃異數萃集
微軀伏念臣孤特寡儔顓愚自守忽膺選任直入凝嚴
翰苑玉堂始識蓬瀛之秘笥衣廐馬浴承雨露之私帶
環無寬急之譏駿足出上中之品粲然在目驟賁飾于
躬章沃若代勞用馳驅于朝路此蓋伏遇太皇太后陛
下任賢不貳隆禮有加何期一介之微併叨三賜之渥
仰圖報稱豈憚糜捐臣無任

乞致仕

臣某言臣聞四十強仕七十致事禮經之善言也壯即
馳驅老宜休息前哲之遺範也自非守經據古如貢禹
正色立朝如趙熹山濤之坐執銓衡秉之之躬任社稷
時方有賴義不得辭苟非其人固宜遵禮臣其中謝伏
念臣本惟孤進早邁休辰忝科第者四紀于茲歷臺閣
者三十餘載荷先朝之獎育玷近侍之登延每念遭逢
常思補報官三黜而復進恩萬分而未酬奔走四方濱
鄰九死終蒙許以直道遂獲脫于丹書陞貳天官遷延

星紀奄罹家難分委丘墟伏遇皇帝陛下纂嗣丕圖搜
揚遺老誤收朽質擢寘通班刑曹文部之煩洊司要劇
經幄複門之秘叅侍清閒向以年逮傳家章言引紱仰
紆賜詔未即投閒雖上戴君仁寬矜彌厚而自量齒耄
勉強終難況獨直於禁嚴愈懷憂于曠弛間然自視耄
矣無能欲丐餘齡稍全晚節伏望皇帝陛下天恢全度
川納微誠閔臣之壯不如人未嘗營于私計在禮則老
有加惠莫若處于安閒惟曲軫于淵衷俾遂諧于宿願

聽還印綬退就里閭如此則春震秋坯同蟄戶之隨氣
候勞生佚老遊天均而善始終倘未至于填溝固不忘
于報國臣欲乞守本官致仕臣無任

又

臣某言臣聞忠以事君進退必由于禮典老而謝事仿
徨忍去于朝廷倘量力之不能雖戀軒而莫及矧乎年
政七十吏長子孫冒寵祿之既多顧筋骸之已憊誠宜
自訟罔避黷煩臣其中謝伏念臣猥以樸儒早竊科第

仁祖寘之館閣十有餘年英皇擢于省臺屢更煩使暨
神宗之初載自將漕以召還擢在從官典領名命每念
累遭于際會皆出聖衷常思自激于懦愚欲圖報効然
而才拙于用力不逮心自取顛隳久負釁累先帝察其
戇直收自外藩官制復于省曹任以左選歲華屢易家
難重嬰偶獲生存分甘棄置伏遇太皇太后陛下擁佑
嗣聖總覽政綱博求遺才誤及孱品官遷省座歷秋卿
文部之煩職列內朝兼經幄禁林之直深慚昧陋無益

毫分向以齒髮既衰封章疊遡雖懇祈于解組尋再被
於賜書又復強顏浸淫累月敢自期於晚節猶冒處於
內廷不惟舊學之荒疏無施潤色加以衰顏之憔悴有
點班聯儼以官箴慙于士論竊自為計亟欲就閒伏望
太皇太后陛下軒鑒察微堯雲覆物閔孤愚之久仕諒
惻惻之無他需發德音聽還王事俾退歸于田里聊保
養于形軀雖疲曳餘年無以庶幾于先進而優游卒歲
尚能歌詠于太平冀于未殞之前獲果畢生之願臣欲

乞守本官致仕臣無任

辭免尚書左丞

臣某言伏奉制命蒙恩特授右光祿大夫守尚書左丞者仰對綸言進參省務揣循叨冒進退彷徨臣其中謝竊以聖政維新允資耆哲之輔治體所繫兼用儒雅之流矧今丞轄之司實亞公台之位萬幾密勿論議得以預聞六職典司得失由其糾正自非才周世務識照事先言合嘉謨舉無遺策則何以上贊國論外協人言伏

念臣涉道非優瘼官寢久四朝樂育獲陪英俊之遊兩
禁踐敷空塵侍從之事以內廷番直之貴奉邇英晝接
之咨日望清光已極榮遇惟齒髮之遲暮禮在引年顧
簪橐之光華絕無進望詎期聖獎曲記舊人錄其寸長
委以重任雖由久故而見用自惟職秩之非輕輒抗遜
章仰煩諭詔伏惟皇帝陛下亶聰稽古則哲知人盡羣
下之智愚察孤忠之朽鈍拔登近輔將以責其施為揆
度寡聞無以稱于眷待伏望俛回睿鑒追寢誤恩息器

小任重之譏遂人欲天從之願顓蒙所守謹斥是虞臣
無任

又

臣某言伏奉制命蒙恩特授右光祿大夫守尚書左丞
者久塵法從無裨補于萬分進貳政樞敢覬覦於大任
忽被發中之詔驟加非次之榮自度瑣才豈堪冒處臣
某中謝竊以中臺議政蓋待天下之豪英近輔登賢實
贊人君之聽斷自非器識足以達大體論議足以折羣

疑素為時望之所歸豈副淵衷之虛竚如臣者齒髮衰
耗知識迂疎以積日累久之勞寢階華顯邁二聖重光
之運徒幸遭逢惟是斗筭之才固非廊廟之器敢圖隆
眷猥賜俞咨二轄紀綱俾之糾正萬幾密勿得以預聞
側聽恩除益增震悸封章雖罄于誠懇莫動天心名器
實假于孱虛懼貽物議伏惟太皇太后陛下凝神道與
留意人才稽堯舜之建官法乾坤之造物修明治體方
期表正于庶邦圖任柄臣豈謂甄收于一介伏望曲回

睿鑒深諒丹誠許追寢于誤恩庶稍安于愚分誓堅晚
節少報鴻私臣無任

謝尚書左丞

臣某言伏奉制命蒙恩特授臣右光祿大夫守尚書左
丞累具辭免蒙降詔不允仍斷來章者進貳鼎司豈瑣
才之宜稱遜辭綸命荷中札之批還悃悞莫從寵光逾
渥臣其中謝伏以尚書百官之本二丞六職之先法天
運平猶北斗之為喉舌掌邦典憲處中臺而振紀綱恭

惟元豐之治官大復南宮之故事特陞省轄超亞公台故每用久歷侍從之官叅以更踐藩垣之守進聯揆路預聞政機委任責成絕覬倫等必也素有時望顯著事功列在近司乃厭羣議如臣者樸學無取老智益昏以七十衰頽之年邁二聖重雍之運典衆職之務既不能振舉于朝規侍清燕之閒又無以發明于聖學浸淫歲月覲媿面顏亦嘗自訟以告歸猶念上恩之未報詎謂聖神之圖任思用老成曲收簪橐之舊人使叅大議自

惟昧陋曷副咨俞繼瀝懇以控陳終賜書而趣拜傍徨
受命進退惟艱此蓋伏遇皇帝陛下體天德之清明攬
治典之纖悉因任原省使人各盡其器能周爰咨詢舉
衆必求于公議何茲僉屬誤及孤愚雖祿厚官尊本淵
聰之虛竚而識迂才薄惟報稱之仰圖臣無任

謝賜生日羊酒米麪

臣某伏蒙聖慈以臣生日特遣中使降詔書賜臣羊
酒米麪者丞轄備官猥叨于器使弓蓬記日嗣辱于

匪碩荷飲賜之所加顧人流之非稱臣某中謝伏
念臣才非遠用仕邁亨辰守樸學以為資躡通班
而冒進荷囊就列久塵清切之塗陪幄宣謀初預
弼諧之寄所慚菲陋上誤咨俞適經載育之辰采
切免懷之念豈謂伏蒙皇帝陛下太皇太后陛下
推隆盛禮假寵輔臣發詔璽以敷言豐燕肴而示
惠餼牽物腆廩稍數優對使駟之光華懷家庭之
榮觀雖親生劬瘁愴弗逮于承顏而君賜便蕃誓

益思于砥節仰酬鴻造敢愛微生臣無任

權樞密院謝傳宣入伏早下

臣某等伏蒙聖慈特降中使傳宣樞密院入伏值
無公事商量早下者金火相乘屬炎威之方熾絲
綸誕告念官守之服勤俾夙退以少休荷宸慈之
彌厚伏念臣等揆材無取被遇過優肉食寡謀空
預聞于國論臺居甚寵曾靡觸于敬蒸伏蒙皇帝
陛下道運乾行德恢天覆循累朝之典則順時令

之慘舒候屬繢隆恩周近輔堯雲在望共分美蔭
之仁樊袞無裨益切進思之効苟惟報稱敢憚捐
糜臣等無任

又

臣某等伏蒙聖慈特降中使傳宣樞密院入伏值
無公事商量早下者炎曦可畏適臨上伏之辰官
次恪居特軫清衷之慮屬當晝景俾遂燕休伏念
臣等猥以瑣材叨塵近列高官厚祿每懼素餐之

譏愛日視陰敢有獨賢之念伏蒙太皇太后陛下
恩霑動植禮遇臣鄰曲推扇暘之仁更廣濯風之
惠雖沿故事蓋出至慈黽勉在公方欣逢于化日
委蛇夙退當益念於匪躬庶効涓埃少酬覆育臣
等無任

乞致仕

臣某言臣聞時來則仕既階華顯之塗年至而
歸蓋重初終之分矧朝廷之故事在典禮之明文

義固當然辭非妄飾臣某中謝伏念臣本由平進
誤被上知居無閥閱之可稱每懼負乘之取累目
營耳剝顧雖勞而無功歲會日成謂有餘而不足
晚遭際會驟見甄收執讀代言常不離于帷幄贊
元經國復參筦于機衡幸逃遁于大何已侵尋于
暮齒送車祖帳敢希疏傳之榮良藥善言庶遂孟
詵之志伏望皇帝陛下仁同天覆恩遂物宜矜犬
馬之力疲許丘園之佚老桑榆晚景猶均化國之

暉松栢素心終守歲寒之操臣欲乞守本官致仕臣無任

又

臣某言臣聞事君以義貴全進退之宜行已有方莫重始終之節矧過傳家之歲難逃竊位之讐敢布懇誠仰祈天鑒臣某中謝伏念臣性質甚戇胸臆無奇生遭累聖之右文世守顯門之陋學居官任職自知無以過人置散投閒固亦分之宜爾勤勞未効憂患相仍已迫衰

齡驟蒙殊用累踐更于朝禁遽擢貳于政司中臺綱轄
之權既叨典領內筦樞機之務復使預聞事無補于毫
分慮徒殫于千一容躬而去幾同車相之處中舉善而
成猶愧祁奚之請老伏望太皇太后陛下心推善貸仁
憫無能俾退伏于丘園許上還于印綬優游聖代尚陪
擊壤之民休佚餘年庶養負薪之疾臣欲乞守本官致
仕臣無任

第二表

臣某言臣近上表引年乞致仕伏蒙聖慈特賜批答不
允者抗章引分粗陳止足之誠出紆數言更示優隆之
禮恩厚而莫知為報情迫而尚復有辭臣某中謝竊以
曰老而傳古有引年之制不能者止義當謝事之時自
非德業被于生民勲勞在于王室繫當時之輕重難自
遂於便安則何以既越挂車之期獨忘竊祿之咎在臣
愚慮實愧斯言念忠孝之規固無云補憫官職之事願
賜少休伏望皇帝陛下天縱至仁山藏不逮矜已衰之

齒髮既久事于軒墀筋力無堪難處喉膺之地田園自
適冀從斑白之游倘或保全于天年尚能歌舞于聖治
臣欲乞守本官致仕臣無任

又

臣某言臣近上表引年乞致仕伏蒙聖慈特賜批答不
許者需牘輸誠緣犬馬之齒耄言綸示眷知天地之恩
深既迫衰殘尚難寢默臣其中謝竊以高位厚祿朝廷
所以待雋賢佚老全生古人所以善終始矧在孤愚之

分累遭際會之榮夙夜在公雖股肱之力是竭日月逾邁顧桑榆之景已侵屬貪戀于熙辰久彷徨于近序浸墮禮典益懼人言願還三徑之居避賢者路冀寓一廛之籍為聖人氓伏望太皇太后陛下洪造全功至仁從欲憫年齡之遲暮俾閭里之安閒倘盛德有容得遂保全於晚節則餘生未殞猶能陶泳于聖時敢忘頂踵之恩永戴乾坤之施臣欲乞守本官致仕臣無任

蘇魏公文集卷四十

欽定四庫全書

蘇魏公文集卷四十一

宋 蘇頌 撰

表

再乞致仕

臣某言竊以禮有傳家之制既已過期官無治職之能
固宜引分苟違大何之責豈邀易退之名輒露心精庶
回天鑒臣某中謝伏念臣學非適世才不過人自童稚

見聞粗知臺閣之故事至聖賢功業徒識君臣之大倫
謬齒諸儒浸階廕仕典領衆職出入四朝荷化育于乾
坤久騫翔于禁近器小誠難於受大恩深窅覺于命輕
逮茲膺力之愆尚玷紀綱之寄達于從政愧非戴胄之
宿名行而後言竊慕魏舒之辭位伏望皇帝陛下矜憐
晚節惻軫睿慈謂君子之業欲及時何資衰老而匹夫
之志不可奪曲賜照臨聽善解于朝冠獲退居于里第
戢鷁鴻之弱羽勿用為儀收牛馬之殘軀俾無失性縱

諧散佚敢忘生成臣欲乞守本官致仕臣無任

又

臣某竊以莅官無補揆才力之易窮謝事告歸審筋骸之難强矧久踰于禮制敢固戀于恩榮祇竭懇誠仰祈昭鑒臣某中謝伏念臣所憑薄陋浮邁休明學古入官顧時才之無取考言詢事校治行以非優十年抱慙於書林二紀持荷于禁闥始緣孤進誤被上知每懷竊位之慙但念捐軀之報松栢之操始無變于歲寒桑榆之

陰忽見收於晚景參陪國論再閱歲暮肉食寡謀職與
憂而並撓蓬心多慮年兼病以俱侵懼高位之疾顛豈
羸軀之可逭伏望太皇太后陛下心推善貸仁憫無能
保全進退之方砥礪廉隅之守察知衰荼聽釋官常至
德有容亦不違于人欲散材無用俾自遂于天年雖處
丘園寧忘朝闕臣欲乞守本官致仕臣無任

第二表

臣某言伏蒙聖慈以臣近上表乞致仕特賜批答不允

者需頭露奏姑罄危誠出紆下書更叨優禮仰循詔意
祇見上衷餘懇未殫嚴誅罔避臣某中謝臣聞竭股肱
而任職所以盡事君之忠量筋力以使人所以示優老
之禮當齒強則仕逮年至而歸斯進退之大方實古今
之通誼敢懷貪冒瀆紊典常伏況承轄之司紀綱是寄
釐百工而欲庶官之無曠開衆正則使羣枉之並消而
臣年迫衰遲學尤迂闊自入陪于大政常內省于非才
贊一日萬幾之謨何堪助治居三事大夫之列久已妨

賢閱歲月以既多視面顏而有覿因祈引老尚冀投閒
雖聖詔在寬未忍遽遺于舊物而人言所指固宜允蹈
於前修苟尚偷安懼難終吉伏望皇帝陛下中恢淵度
下徇物情推天地之至恩察禽魚之所欲許其遂性賜
以殘骸將使皓首清朝歌詠太平之盛角巾私第優游
羣萃之間得請為期沒齒知報臣欲乞守本官致仕臣
無任

又

臣某言伏蒙聖慈以臣近上表乞致仕特賜批答不許者抗章有請念舊不遺跪讀訓辭內深感涕臣某中謝竊以不能者止否則至於敗官自知者明行之在乎審已矧寵恩之既過加年制之宜休雖君親之眷未忘而卿庶之言攸戒終期賜可敢重陳情伏念臣人本下中任叨顯近久負素餐之誚尚寬司敗之科稽按禮經當還職事阜囊露奏叙遭際之有年尺詔數言荷矜存之盡禮未令置散復俾冒榮伏況南宮二丞總王官之六

職太微四輔贊天子之萬幾自非强有力之才必致罷
不勝之責顧茲昧陋加以耄昏入侍殿帷每虞于顛仆
出釐省務益苦於沈迷縱勉強于夙宵難遷延於歲月
彷徨再黷惕息無從伏望太皇太后陛下恢天德之清
明審人才之能否壯而任其力可以責于事功老者遂
其情俾處之於閒燕特頒俞旨聽解見官西夕餘光倘
未淪于濛汜東郊卜築尚依止于王畿臣欲乞守本官
致仕臣無任

辭免右僕射

臣某言伏奉制命特授臣左光祿大夫守尚書右僕射兼中書侍郎加上柱國進封開國公加食邑七百戶食實封三百戶臣尋具劄子辭免伏蒙聖慈特降中使賜臣詔書不允者告廷命下鼎司誤擢于非才捧制魂驚囊奏輒辭于異數祇被璽書之寵答恭承天旨之恩褒義有未安理難中默臣某中謝臣聞昔聖王之命相也必先審觀器能稽衆行實知其可任也然猶考之蓍龜

謀及卿士而後授之其重如此故能表率百官緝熙庶績以輔成王業而寅亮天工屬逢治朝慎重名器公台並進豪傑相望如臣至愚本非大受有能俱短自知甚明覈其藝文不離刀筆箱篋蓋史官博士之才發于事業惟在期會簿書非大臣公輔之器徒以荷知二聖預列近司閱歲再朞洊朝累久贊功論道硜硜不逮于衆人詢事考言碌碌每虞于大譴加之暮齒已絕進心驟膺右弼之咨兼重二臺之委力小任重竅負不勝之憂

福過災生斯為必至之理敢殫再瀆之懇仰俟曰俞之音伏望皇帝陛下太皇太后陛下推鴻造之生成察羸軀之疲曳博求時望叅聽師僉必有築巖兆夢之賢來符爰立庶使鑿址益高之累不在孤危干瀆宸嚴臣無任

第二表

臣某言伏奉制命特授臣左光祿大夫守尚書右僕射兼中書侍郎加上柱國進封開國公加食邑七百戶食

實封三百戶臣尋具劄子辭免伏蒙聖慈特降中使賜臣詔書不允者再殫危懇期力避于誤恩洊拜批章尚未俞於素望雖言輕莫能動蓋高之聽而情至無由避三黜之煩仰叩睿明恭祈可旨臣其中謝伏以尚書之設二揆昔稱師長之官春秋之尊上公是為天子之宰有其人則起巖穴辭釣築用不為過非其任則覆鼎餗橈棟梁人將謂何蓋四方百辟之所瞻豈積日累久之可致矧當覈實之日尤見進人之難如臣者履歷無奇

遭逢惟舊學將落而智已耄任益重而志深衰其在朝廷典領雖更於事任試之丞轄毫分無補于公家坐閱歲成寢加齒耄據經告老每懷止足之心輔政持衡固非衰遲之任驟膺殊渥進躡中階鰲貌塵纓豈稱衰衣之貴秩孤誠小節願回麻制之新恩非邀沖退之名實覲保全之幸伏望皇帝陛下太皇太后陛下察言觀行選衆舉知深惟體貌之隆更重股肱之寄三公之官不必備當待異才一國之人皆曰賢乃加圖任收止揚庭

之命免貽游校之譏所係非輕得請是望臣無任

謝右僕射

臣某言伏奉制命特授臣左光祿大夫守尚書右僕射兼中書侍郎加上柱國進封開國公加食邑七百戶食實封三百戶尋具表辭免伏蒙聖慈特降中使賜臣批答不允仍斷來章者天工人代而無曠官聖王所以重于命相德薄位尊而鮮不及前哲所以審于量能顧惟衰朽之餘猥被弼丞之選躡三階之名秩兼二省之事

權恩數寢隆責任彌重趣拜往俞之命益深非據之憂
臣某中謝竊以大臣國家之股肱蓋同一體卿相人主
之几杖用正四方稽在昔之聖明委政事于輔佐任稷
契之筋力唐堯所以和萬邦得良平之腹心漢高所以
成大業肆我朝之致治放上世之休功承平者百三十
餘年登用者四十有九相勲猷允集豪傑相望炳若丹
青見于圖像重明在御建輔尤難自非得高世之真賢
何以蹈羣龍之偉躅如臣者資無異稟仕偶亨辰出入

四朝殫竭千慮居官任職非汲黯社稷之臣激濁揚清
無山濤廊廟之器徒以遭逢既久憂患兼深差池寢迫
于桑榆蓄縮每懷于粉梓詎期晚節猶點榮塗荷二聖
之甄收首六官而進用洊陪經幄繼直禁林省轄左綱
輔政未收於薄最天臺右相位槐遂列于上司忽驚非
次之恩屢上固辭之請循牆而走漫勤三命之恭坐廟
以行深負萬人之責此蓋伏遇皇帝陛下廓規撫于三
代核名實於羣臣克勤于邦體乾健之不息注意于相

致泰亨之大來方圖舊于耆明將仰成于幾政豈臣昧
陋足副登延鎮俗移風固非公權之宿望守文持正敢
希宋璟之精忠倘有補于萬分敢憚辭于九殞臣無任

又

臣某言伏奉制命授臣左光祿大夫守尚書右僕射兼
中書侍郎加上柱國進封開國公加食邑七百戶食實
封三百戶尋具表辭免伏蒙聖恩特降中使賜臣批答
不許仍斷來章者求賢以備近職上輔邦經孚號以告

外庭蓋參公論詎意耄荒之質猥當簡注之求仍進峻
于朝階復躡陞于公爵勲封並進名器益隆首戴嶽以
難勝背負芒而集懼臣其中謝竊以統理庶務師長百
僚在今二揆之崇乃古三公之任廟堂論道極天人精
祲之微帷幄陳謨盡文武弛張之術非賢罔乂惟帝其
難俾之預裁成輔相之宜必俟得明允篤誠之士如臣
者進惟一技仕歷四朝少履亨塗升黜僅踰于三紀晚
叨非任甄收特出于兩宮秋曹選部之踐更浴殿邇英

之延訪每思齒髮之衰暮屢丐田廬之退休豈惟未遂
于素誠更乃重蒙于獎擢入持綱轄叅預政機乏贊襄
熙載之功負委任責成之意敢期聖度未棄老臣制書
忽降于帝俞宰職使承于人乏南宮右相西省內樞併
假寵于非才懼疾顛於重任輒殫僭懇丐寢誤恩輸誠
已至於再三趣拜屢頒于尺一雖絲綸誕告綽窅大而
莫收而縈枕扶傾棟且隆而必撓省思其分造次靡寧
此蓋恭遇太皇太后陛下垂衣裳而取諸乾坤柄爵祿

以馭其富貴親賢為急法唐堯之用心降已不遲邁商湯之臨下察羣才之能否矜一介之孤愚拔于稠人付以大柄位非所據臣猶自知惟當盡至公之心不敢懷苟得之幸衣冠蘊藉常戒韋平之譏臺閣規撫願遵房杜之業用茲許國誓以捐軀臣無任

乞致仕

臣某言臣聞物壯則老蓋天理之固然器滿則傾在人情之攸戒矧夫齒髮衰謝爵位隆高倘猶昧於退藏行

必招於顛覆懇誠所迫冒黷寧逃臣某中謝伏念臣稟賦無奇遭逢有素敷歷中外竊祿者逾五十年校量事功報國而無萬分一迨茲羸薊尤切歸休不圖疲曳之軀簡在聖明之眷擢由省轄旋正宰司每慙誦數之儒久玷訐謨之地未將腐朽難荷棟梁之材衡僅錙銖莫勝鈞石之重不能者止自知甚明敢殫量力之誠再露乞骸之奏伏望皇帝陛下太皇太后陛下至仁惻隱盛德包荒均委照于大明推曲成於全度使人以器方圓

大小隨其宜造物如天生長收成遂其性矜臣愚耄許臣便安七十傳家俾克諧于私願尺一歸第獲保養於頽齡雖處丘園敢忘朝闕欲乞守本官致仕臣無任

第二表

臣某言伏蒙聖慈以臣近上表陳乞致仕特賜批答不允者至誠上露丐還印綬之榮中旨下頒渚降絲綸之語未從願望敢重叩陳臣其中謝伏以委質清朝固念忘軀之義引年暮景蓋思歸骨之期矧既迫于耄齡實

已踰於禮制尚尸官秩益負覲顏伏念臣猥以孱虛久
叨任使位崇三事職贊萬幾進無特立獨見之明上裨
國論退忘量力知止之分自為躬謀勉彊立于周行之
中浸尋至于嗟耄之悔筋骸寢憊精爽彌昏悴質羸軀
視簪纓而有愧孤誠小節議帷幄以何堪是用控布腹
心之微干祈旒冕之聽仰紆睿眷特諭褒言雖鴻造曲
成未忍棄捐于陳舊而危心自揣固難貪冒于寵靈但
虞覆餗之僇上玷知人之哲煩言喋喋中抱兢兢伏望

皇帝陛下太皇太后陛下察見精衷灼知衰朽賜保全
於晚節俾休逸于餘年聽解政機許歸里第所冀遊化
國之日遂安養于天倪與擊壤之民共謳歌于聖治臣
欲乞守本官致仕臣無任

辭免郊禮加恩

臣某言禮行郊廟之祀慶浹綿區內出絲綸之函恩均
近著顧備員于丞弼叨進律于戶封側聽明敕實增憂
惕臣其中謝伏以報本反始禮經所以尊大神發政施

仁霈澤由之逮黎庶內則公卿扈從之列外則方岳封疆之賢咸有來助之勤宜先賚善之錫詎期愚陋首被旌褒伏念臣樗櫟材疎犬馬齒耄誤蒙二聖之眷擢在四鄰之班位上中台之階久塵顯要講南北郊之議靡有發明伏遇皇帝陛下遠法祖宗之謀躬嚴聖孝之享薦裸九廟彌盡時思之恭合祀二儀欽修昭事之敬煙燎云畢人神以交嘉與夷夏之間同均雷雨之施遽頒明制假寵非才增書社于千家衍真租於百乘雖官居

衡軸推命數以惟優而効乏涓塵聞德音而靡措量能
揆已將恐且驚伏望皇帝陛下如日燭幽均天子祿慎
假人之名器重為國之典常特徇愚衷聽還前詔庶幾
在官追無功受賞之譏勉慕古人盡以道事君之節兢
凜之惓殫竭于茲臣無任

第二表

臣某言肆類圓丘靡有相祠之効貢章宸極願還增邑
之恩祇被詔函尚煩敦諭顧迫難安之義敢辭再瀆之

尤臣其中謝竊以饗帝與親非聖孝不能兼其事詔王
以柄先爵祿所以馭其臣欲無虛受則當念量可以
勿予則或虞傷惠苟見得而忘義必近辱而招憂伏念
臣學昧大方仕無小補幸遭時而取寵久充位而蒙譏
方國家報本之初乃臣子竭誠之際既不獲執豆籩而
陳力又未嘗陟壇陛而致恭徒叅扈蹕之勞敢有貪天
之効例叨優渥深愧踰涯伏望皇帝陛下特軫睿慈曲
從人欲許遂匹夫之志聽歸千戶之封不稼取禾庶追

伐檀之刺無能倍賦免貽鳴鼓之攻傾族俞音俾安愚
分臣無任

蘇魏公文集卷四十一

欽定四庫全書

蘇魏公文集卷四十二

宋 蘇頌 撰

表

謝郊禮加恩

臣某言奉大神之祀既協休成均率土之釐普沾慶賜
顧備員而無補叨進律以加優雖罄牢辭靡諧誠懇臣
其中謝竊以漢室疏封之制非有功而不侯周家大賚

之恩惟善人而是富方上主智臨之盛講三年郊見之儀合祀泰壇陟配烈祖萬靈感格四海駿奔湛恩浹洽於邇遐協氣充塞于上下凡在臣工之列咸修職業之常贊彼上儀受茲介福如臣者幸遭時用濫厠宰司初無顯相之勞首被疇咨之渥進加戶邑增衍賦租居常畏于滿盈義當知于止足令難反汗莫回誕告之文賞弗值才坐愧食功之誚拜嘉有覲揣已何堪此蓋伏遇皇帝陛下德盛在躬仁漸無外誠著事天之實政先惠

下之方禮行于郊周盡百王之能事命降於祖自得萬國之歡心再惟頂踵之微莫報乾坤之造奏甘泉之賦既乏雄辭詠蓼蕭之詩徒涵帝澤誓殫駑蹇上答生成臣無任

又

臣某言二儀並貺儲厚福以浸黎元百辟在庭對茂恩而先衆輔聽制音之誕告賦食采以增多靡獲固辭終慙虛受臣某中謝伏以郊祀國之大事用逆神釐封戶

古之諸侯實崇命數周人以惠術而觀政漢制非功臣而不封治世有賢官儀約古進加寵祿抑有故常雖緣祭澤之所頒固在爵名而尤重伏念臣早蒙聖眷擢預政幾閎閎無可紀之勞股肱有不良之誚會兩宮之講祀舉三歲之親郊主上躬薦于廟丘萬靈咸秩攸司奔走於官次百職具修顧惟備員初無云補均被等功之賞并加多邑之封薦控囊章固難回于渙汗祇膺綸詔良有積于厚顏此蓋伏遇太皇太后陛下器使羣才天

恢全度廣上恩于率土推大賚於庶工近弼四鄰特優
隆於禮秩爰田千戶俾增峻于等威居懷尸素之慚重
享便蕃之渥德不稱祿有鑿址益高之虞職掌建邦思
徇國忘軀之義不渝晚節仰答鴻私臣無任

謝集禧觀使

臣某言伏奉制命蒙恩特授臣依前左光祿大夫充觀
文殿大學士集禧觀使者罷軟不職致臺議之誼騰溥
愛無私冒君恩之過渥弛近司之重責加內殿之榮名

方岳真祠特推置使之命路朝晨謁仍簡造廷之期罷
政禮優比年例寡循涯揣分被寵若驚臣其中謝伏念
臣曲學鯁生遠塗暮景竊祿久汙于華近議年早合於
退藏屢控乞骸之章游干黜黜之聽伏遇皇帝陛下太
皇太后陛下博求耆舊誤逮疎虞省座禁林冠通班于
邇綴左綱右揆預大政于中階臣於此時竊懷感遇慕
古人之行惟知持正而守文適當今之宜不能開物而
成務自為謀拙動與時違果噴煩言上孤聖眷進而負

四海之望其罪寧逃退而兼三綬之榮何名以稱徬徨
拜賜愧懼在顏此蓋伏遇皇帝陛下太皇太后陛下旋
運化鈞擎收威柄咨輔弼丞疑之任贊樞機帷幄之謀
校歲月之勤則記其功而忘其過納朝夕之誨則捨其
短而用其長知臣本誦數之儒不責以經綸之業置臣
于侍從之首仍使就間燕之居憫老矜愚恤私從欲恩
同造物自生育而至于成才禮越常均既罷免而猶如
在事臣雖甚慙粗有所知假名器之益多非軀命之能

報今茲去位猶叨職秩之優異日掛車尚有田間之請
懇誠所激夙夕不忘臣無任

乞致仕

臣某言臣聞馳驅休息蓋壯老之異宜進退存亡實吉
凶之所兆而況仕而陳力老而傳家既踰濛汜之年加
有清漳之疾尚包羞而苟祿必招損以危軀敢控丹悰
渚干淵聽旁皇固措顛越是虞臣其中謝伏念臣本無
過人之才謬緣稽古之力誤知二聖進秩三階苛碎失

名致人言之匪厭遂巡去位荷上眷之不移擢置殿塗
寵兼真館併優隆於異數深愧負于素餐方今聖政日
新賢才彙進居官任職人皆念夙退之勞責實循名臣
獨處燕閒之適校其勤怠宜有汰澄顧物理之推遷果
天殃之逮及士安之久嬰咳逆軀半不仁貢禹之私願
罷歸死無所恨況累陳於奏牘猶坐玷于榮班寢迫衰
遲益難安處伏望皇帝陛下太皇太后陛下閔憐耆耄
深察疲羸推覆載之大恩廣生成之至德貸往愆于鈇

質不責其終放散跡于丘園使遂其性倘獲退安於衡
泌亦將不遠于都畿庶舊疹稍瘳或殘骸未殞與父老
共歌於帝力冀樛櫟得盡于天年陪三歲羔裘之郊非
所敢望遇仲秋鳩杖之賜庶或與存冒瀆威顏必期開
可臣欲乞守本官致仕臣無任

第二表

臣某言伏蒙聖慈以臣近上表乞守本官致仕特降詔
書不允者犬馬齒耄宜寄跡於丘園雨露恩深重敷言

於綸綍顧懇誠之未聽由剖析之靡周罔避瀆煩終期
報可臣其中謝伏念臣散才濩落晚節摧頽望實不足
以厭羣心謀猷不足以濟遠略在言語侍從之地既無
一日之長責輔相經綸之謨固乏萬分之補退居閒佚
上諉生成祿不值功詎止食浮于人之誚福微勝羽每
懷鬼瞰其室之憂爰自累歲以來屢貢乞骸之請仰紆
異眷敢愛微軀徬徨求去而欲報主知舉措失中而動
貽物議寢迫桑榆之景愧叅槐棘之班考之禮經謝事

之期已過揆之人事求全之念都忘復何面顏苟貪爵位伏望皇帝陛下太皇太后陛下仁推惻隱明察幽微蓋之如天冀俛從于人欲愛之以德使粗保于廉隅亟降俞音俾諧素志軒裳解釋免罹文豹之灾藪澤浮沈稍遂淵魚之適倘殘骸之未殞報洪造以寧窮臣無任

第三表

臣某言伏奉今日詔書伏蒙聖慈以臣再上表乞致仕所請宜不允者七十餘齡禮典自當于告老尺一中

詔訓言未賜于允諧雖淵衷篤念舊之仁而病體益負
芒之愧內懷憂迫罔避僭踰再控危悰難逃大譴臣某
中謝伏念臣蠢冥不競樸直寡儔誤被聖知擢叅幾政
以瑣才預廟堂之論何取訐謨以腐木廁槐棘之班自
招浮議尋罷歸于里第仍留置于真祠役不受功空飽
支離之粟人斯失望敢安曠廢之僚常切掛冠猶稽上
印伏況器名踰分年病交侵蒲柳望秋奚勝雨露之澤
桑榆向晚難延晷刻之期尚願丐于殘骸冀克完于晚

節伏望皇帝陛下太皇太后陛下天從人欲海納汙流
諒不奪之至誠降曰俞之大命素餐尸祿免貽貢禹之
譏居常守終覲遂榮期之樂獲同黎庶歌詠太平臣無任

揚州謝上

臣某言昨奉勅差知揚州軍州事已于今日到任禮
上訖者奉尺一詔以歸第僅越三時假二千石以治民
再膺八命固辭靡獲趣辦遂行黽勉臨州徬徨向闕臣
其中謝伏念臣才資不厚遭遇最深仕歷四朝晚登三

事荷旒明之委照謂無他腸顧衮職之闕遺曾微小補
卒致煩言之嘖未從司敗之誅伏奏引年屢丐上還于
榮紱清衷恤老特令置使于真祠徼幸實多覲慚非一
豈意衰遲之景尚蒙岳牧之咨挈舟利涉于安瀾交印
遂頒于寬詔祇循寵渥益懼顛隳此蓋伏遇皇帝陛下
天德包荒乾綱獨運任人惟舊視遠斯明念犬馬有守
禦代勞之勤老猶不棄謂州郡有職閒無事之地欲其
少休因析左符俾藩要路矧茲陋族本占江干淮海與

區名在九州之列松楸故國地纔一水之遙緣近歲守
臣之文有過江上冢之例營私至便責任奚勝平易近
民敢豫言于報政中和樂職姑願効于歌詩但虞筋力
之疲終覬田間之請仰酬洪造靡惜餘生臣無任

乞致仕

臣某言臣聞老無能為難當壯者之食進不知退必有
大耄之嗟矧已迫于衰殘嘗屢陳于惓惓苟貪寵祿實
覩面顏臣某中謝伏念臣生稟顓侗仕逢熙洽自一命

而至于八牧累玷官儀歷二府而亞於三階預聞國論
年過七十効蔑毫分尚塵禁殿之近班仍藩淮海之要
郡賦分至薄自知甚明福輕乎羽而莫勝顛冥且久中
結若轡而為病疢頓踰年雖黽勉以從公終隕越而是
懼按禮經則久當謝事考職業則固合黜幽曲荷矜全
敢圖安佚伏望皇帝陛下隆恩荃宰運化陶鈞照臨如
日之升誠明盡物之性念伏櫪之疲馬難戀君軒使垂
翅之孤禽遂還林野倘未填于溝壑猶不遠于甸圻導

引延年固靡希于漢傳謳歌樂聖終願效于堯民虔俟
恩俞冀全晚暮臣欲乞守本官致仕干冒宸扆臣無任

第二表

臣某言今日日進奏院遞到伏蒙聖慈以臣近上表乞
守本官致仕賜臣詔書所請宜不允者老臣以憊而告
歸實虞罪戾明詔以恩而不聽載荷曲全恭承訓勅之
辭重負曠尸之責敢殫懇至洊瀆旒明臣某中謝伏念
臣稟賦甚愚遭逢最舊歷禁塗而殆遍預幾政以無堪

早合退藏尚茲塵冒通班秘殿便蕃職秩之榮督府方
州叨竊兵民之寄每思病耄有愧長臨福常懼于滿盈
心益存於止足簪裳被體永炭交懷蓋以強仕老傳而
有年禮經所戒宦成名立而不去前哲尤譏矧疲瘵之
已侵敢宴安而遑處伏望皇帝陛下甄陶萬化綜覈庶
工察臣陳力之不能憫臣視息之無幾如天育物全生
長收成之仁以齒使人異驅馳休息之惠逮其未殞賜
以餘生舊爵崇階固足光榮于世族殘年朽骨庶幾保

養于天倪延首中宸竚期可旨欲乞守本官致仕干冒宸嚴臣無任

第三表

臣某言今日日進奏院遞到伏蒙聖慈以臣近再上表乞守本官致仕賜臣詔書所請宜不允者素髮垂領久汙簪紱之行阜囊奏封屢瀆續旒之聽俟恩俞而未遂紆寵答以彌優祇誦訓言莫勝負戴俯循危懇敢重敷陳臣其中謝伏念臣天賦樸愚上憐孤直入預幾衡之

政出宣屏翰之風淮海一隅已積曠官之誚嵩輟千里
輒辭守鑰之行蓋以任重則必致疾顛年至則自當退
處日西方暮好書者猶慮難圖夜行不休居位者所宜
知止矧茲瘁質固已自知伏遇皇帝陛下攬邦政之福
威覈人才之賢否式序羣品不求全能眷惟瑣微嘗更
寄委逮茲衰晚尤切始終上印綬于有司倘蒙從欲歸
草茅于舊服尚冀全生苟因適于安閒遂稍蠲于疾疹
所完餘日莫非上恩辭盡情殫心危喻拙欲乞守本官

致仕干冒宸扆臣無任

辭免西京

臣某言今日進奏院遞到勅牒一道伏蒙聖恩就差臣知河南府兼西京留守司公事者聞命震越進退彷徨伏念臣年齒已侵寵榮踰分洊朝尸祿獲罪固多昨蒙睿慈擢守鄉郡過家上冢私願既從忼歲視陰餘日無幾近者載露囊奏丐上印章告歸田間冀全骸骨未奉俞音遽易別都內省荒孱曷勝寄委蓋以衰遲之暮

景久塵嚴近之通班坐守淮東安佚之邦猶懼不逮使
當西郊走集之會實非所宜伏望皇帝陛下矜臣筋力
之疲羸難堪治劇察臣懇誠之迫切姑欲就閒乞回天
恩下遂物性臣無任祈天俟命激切屏營之至所有差
勅臣未敢祇受見送揚州軍資庫權寄納欲乞特降指
揮檢會臣前後累奏陳乞致仕文字早賜施行

第二表

臣某言今月日泗州差人送到詔書一道伏蒙聖慈以

臣近辭免差知河南府恩命并乞致仕所請宜不允者
捧對綸函伏深股慄誠有未盡言不避誅伏念臣遭遇
聖明敷歷中外分毫未報齒髮已衰假守便藩已踰素
望保釐近旬實懼非才向因陳情輒祈退老仰紆詔札
曲諭眷懷固合趣拜除書即赴新任緣臣近已三上章
奏丐歸田廬未奉俞音方虞重譴豈可尚貪寵祿更領
要衝量力校能兩難任責重念臣頻年灾禍妻室喪亡
敢布腹心上干君父此蓋伏遇皇帝陛下憫憐朽質久

汙近班特軫天衷俾還官政庶令晚節逭貪煩戀劇之
譏益見清朝貴引年謝事之禮孤誠所迫得請為期臣
欲望特降指揮檢會前奏乞守本官致仕早賜施行干
冒天威臣無任

揚州再任謝上

臣某言六月十六日准尚書省劄子以臣近辭免知河
南府新命乞守本官致仕奉聖旨依舊知揚州已于當
月二十九日交割公事管勾訖者章辭留鑰揆薄祐以

難當詔復舊藩戴隆恩而益懼欽承言縛俯集背芒臣
某中謝伏念臣向以孱虛誤蒙簡擢年侵力薄方祈田
里之歸福過灾生遽遘室家之釁憂傷狼狽進退徬徨
輒傾迫切之誠仰叩高明之聽敢圖聖造俯念羈屯特
推矜恤之慈俾遂便安之計淮海一都之會再假事權
京口數舍之間切鄰鄉社感極而涕洟橫集懼深而冰
炭交懷積是兢虞敢遑寧處此蓋伏遇皇帝陛下至仁
惻隱大度含洪視民如傷愛人以德一物失所上千天

地之陶甄千里雖遙灼見道途之艱苦不遺舊老復使
長人但顧疲癯靡勝寄任況印章未解固當盡瘁以首
公倘筋力向衰行覲投誠而告老臣無任

乞致仕

臣某言臣聞蒲柳經秋已有凋零之患禽魚向暮必求
棲宿之安物固當然人亦宜爾矧禮年之云至加疲沓
之交攻屢上封章丐歸田里愚衷未盡敢殫萬一之辭
聖度并包罔避再三之瀆僭言不已典憲寧逃臣其中

謝伏念臣才本下中仕踰四紀居官無塵露之益竊祿
過釜鍾之優罪積誤朝恩隆補郡留連主簿歛踰絳老
之年衝冒風霜復迫漳濱之卧中乾而加以咳逆蹠齧
而不良能行出見吏民愧慙株之既朽自憐軀命類藁
蒂之甚危每思止足之言深蹈滿盈之戒雖茲勉強益
懼顛隳伏遇皇帝陛下達堯四聰明舜庶物念日是奎
嗟之咎推天覆地載之仁顧在衰遲倘諧退老非欲棄
人間之事慕赤松之遊止期蔭林樾之庥希鴻烈之訓

收骸里閭養疾衡門獲盡數以天年實荷恩於聖造欲
望睿慈特賜指揮檢會臣前後奏章許守本官致仕臣
無任

第二表

臣某言今日日進奏院遞到詔書一道伏蒙聖慈以臣
近再上表乞守本官致仕所請宜不允者懇誠迫切奏
牘頻煩渚紆批鳳之函弗聽解龜之請雖睿恩天覆未
忍以老而見疎然衰病日侵自顧不能而宜去仰承敦

諭愈重過尤進退靡遑顛隳是懼臣某中謝伏念臣仕
踰四紀官歷三司平時無橫草之功晚歲有負薪之疾
高官厚祿豈疲沓之所勝皓髮蒼顏況精神而已敝臨
事每多于廢忘省躬久合于退藏竊自為謀實非過計
若猶得及於視息盡志丘墳庶幾稍就于燕閒專精醫
藥上恃君親之眷復殫螻蟻之情伏望皇帝陛下運化
陶鈞生成品物覈羣才之能否念舊弼之徃殘曲軫清
衷亟頒俞旨或假以上大夫之秩歸息蝸廬俾列于鄉


三老之間時親鳩杖倘未填於溝壑深結戀于軒墀西望馳誠終期得請欲乞守本官致仕干冒宸衷臣無任

第三表

臣某言今日都進奏院遞到詔書一道伏蒙聖慈以臣近者再上封章乞守本官致仕所請宜不允者意切言疎未動高明之聽恩隆禮厚洵頒寵答之書祇誦訓辭俯慙悴質循涯自訟欲默良難臣某中謝伏念臣以儒學承家以文科補吏能事教忠之訓夙稟義方強仕

老傳之言粗知名分榮遇既踰于始望暮年猶躡於近
班積尸素之愆尤致風淫之疾疹腹心咳欵夙宵幾廢
于寢興步履蹒跚朝晝頗難于出入豈止違殆辱之戒
抑將蹈滿盈之災爰自累歲以來屢有陳情之奏荷上
心之矜恤紆中詔以留連姑黽勉以在公實支離之難
强是敢再殫懇悃重冒淵聰丐未殞之餘齡復就間之
州處伏望皇帝陛下離明燭遠天度包荒特推從欲之
私俯降曰俞之旨許還章紱退就衡門倘得遂于全軀

尚冀諧于佚老蓄房公之參朮稍起疋羸藝陶令之桑
麻更思造適骸骨雖投於畎畝夢寃猶戀于軒墀歟至
之誠徬徨罔措臣欲乞守本官致仕干冒睿慈臣無任



蘇魏公文集卷四十二

欽定四庫全書

集部

蘇魏公文集卷四十三
五至

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遜

謄錄監生臣施華

欽定四庫全書

蘇魏公文集卷四十三

表

謝中太一宮使

臣某言今日進奏院遞到勅牒一道并尚書省劄子
伏蒙聖恩特遣充中太一宮使許任便居住臣即時受
命交割本州公事與監司權管勾訖見起發往潤州居

宋 蘇頌 撰

住者臣本以衰遲懇祈休退淵衷眷舊未忍遐遺琳館
增員仍從遙領坐叨要職特免莅官遂獲安居皆為異
禮臣其中謝伏念臣性稟中下生遭盛明荷四朝樂育
之恩歷三省訐謨之地非才輔政不能有所建明失職
弗誅尚且容于尸素殿廬通籍淮海出藩顧筋力之已
疲視章印而有愧冒茲名器負乘每懼于盜招念彼禽
魚棲宿猶知于日暮殫誠牘奏于聽黈聰敢期從欲之
仁上軫恤功之念明綏降命中旨推慈假使職于元都

許家居于故里官尊祿厚頓增桑梓之輝光迹放心閒
實使丘園之願養此蓋伏遇皇帝陛下乾坤博施坯冶
一陶生物必因其材使人各得其所曲矜最耄久預禁
嚴未遽絕于班資俾遂諧于燕息始終弗替蹇薄難勝
病木婆娑雖殆忘于生意老馬躑躅猶結戀于君軒欲
報生成未知死所倘肺肝之可鏤在溝壑以無忘瞻望
宸庭但深涕洟伏限所居在遠不獲躬詣朝闕臣無任
謝郊禮加恩改封趙郡公

臣某言伏蒙聖恩賜臣官告一道改封趙郡開國公加食邑七百戶食實封三百戶仍令臣孫男承奉郎處厚齎賜者祭則受福頒大號于黎元賞不失勞推茂恩于庶位曲記近司之舊猥加異數之隆案輿地而擇名邦徹土田而與多邑循揆無功之寵愈驚非據之危臣某中謝伏念臣撓棟匪材西崕餘景夤緣資歷久玷職于殿廬荏苒年華獲備員于道館當官無閑閱之勞退老遂鄉閭之願一昨五室親祠百工率職肅雍顯相既不

預三吏掃除之勤夙夜駿奔又不在諸侯來助之列既均釐于中外輒比數于等差再膺開國之榮更益爰田之食仍令孫息齋賜命書即郊次以奉迎集私門之榮觀屬已頒于渙汗難固避于走牆捧對芝泥若負芒刺此蓋伏遇皇帝陛下繼天紹統灑澤為春遵六聖之宏規躬三年之盛禮宗祀而配上帝致聖孝以並行大賚而富善人布神休而悉遍自顧曠僚之久難勝拜胙之恩雖燕閒方就于士鄉無階報稱而寃夢常游于帝所

圖謝生成瞻僚九門姑懷萬感臣無任

再乞致仕

臣某言臣聞禽魚微物猶知棲宿之安韋布諸生不忘
殆辱之愧矧在士鄉之老既踰時制之期謝事未俞厚
顏罔措臣其中謝伏念臣稟資不厚徼幸實多荷四朝
拔擢之恩乏一善著聞之事姑緣舊弼久塵冒于近班
洊領真祠復遷延于再稔處燕閒而竊祿致盈滿以生
災初罹手足之痾寢苦膏肓之病秩滿而造朝有格力

綿而跬步難前日薄虞淵視光陰而已逼心存魏闕後
寃夢以徒勞若猶綰于印章懼遂填于溝壑況臣頻年
告老猶此饗榮年過六紀之餘章凡十數而上朝廷容
養幾同游隋之人州里觀瞻寧免婆婆之誚輒陳情之
終始覬得請以歸休伏望皇帝陛下恢天地覆載之仁
廣日月照臨之惠憫衰遲之暮景貸尸素之往愆賜以
殘骸從其所欲倘能起無妄之疾游息于田廬庶幾為
太平之民謳歌于聖域誠心所迫邦憲寧逃欲乞聖慈

指揮檢會臣前後奏章特許守本官致仕臣無任

謝致仕表

臣某言伏奉告命蒙恩特授臣依前觀文殿大學士太子少師致仕仍差臣男通直郎詒齋官告就賜者結髮立朝歷載將周于五紀解巾就第拜官叨列于三孤士夫進退之優君父保全之惠寵踰所望感極難名臣某中謝伏念臣朽質薄材華顛鰲貌早嘗更于器使老猶冒于寵光福過災生幾致膏肓之疾鐘鳴漏盡未知骸

骨之歸奏封屢瀆于邃旒俞音特加于命數仍循舊相
之比躡遷儲秩之榮而臣久任聖辰驟違班著念流波
之出浦嗚咽難前顧疲馬之戀軒嘶鳴未已雖獲傳家
之幸豈忘存闕之誠恩重命輕莫稱丘園之責日暮途
遠無階象魏之朝回望雲天徒深涕淚此蓋伏遇皇帝
陛下陶鈞萬彙化育羣才俯矜管蒯之微嘗與鼎槐之
末全其晚節賜以餘齡非惟示覆載之不公抑亦見生
成之曲盡顧臣之分微幸已多尚冀安居養頤衰疾倘

未填于溝壑得雜處於芻蕘

謝轉太子太保

臣某言伏奉制命蒙恩特授臣太子太保依前觀文殿大學士致仕加食邑四百戶食實封一百戶仍差臣男通直郎攜齋告身前來就賜臣已于今日于潤州朝京門外望闕祇受訖者芝泥溫詔初降命于九重蒲柳殘骸遂通班于一品自慚悴陋莫副甄陶事出非常感深載抃臣其中謝伏念臣才非敏達仕邁休明荷樂育

于五朝嘗叨陪于三吏與聞國政固乏佐時之謨退老
丘園猶霑馭富之祿熙辰累洽興運有開帝出震以乘
時照臨溥暨言如綸而求舊獎擢併加進儲保之崇資
衍戶封之多邑仍令賤息齋賜贊書病悴有年久棄人
間之事寵靈驟及實為望外之榮姑慶暮塗親逢亨會
此蓋伏遇皇帝陛下宅中圖大發政施仁推布德行惠
之文靡謝事就閒之隔念此故老早陳力于周行霈然
德音特加優于異數臣敢不濯冠聽命捨杖拜恩誦深

厚之訓辭仰欽天造詠光華之復旦竊效壤歌雖畢餘
生莫酬洪造臣無任

遺表

臣某言臣聞稟質太和生有涯而必盡戀恩聖代死可
忍而猶言苟延頃刻之期少布平生之懇臣某中謝伏
念臣性識庸陋生長遭逢仁宗召寘書林英廟擢為臺
省肆神考維新于大政而微臣獲覲于清光便荷眷知
躡登侍從臣以口耳無用之學驟蒙睿聖非次之知思

自激昂少圖報稱竟以議詔除之非是遂止罷書命之
要司三已三遷未嘗以冗外而擯棄再召再用率皆由
主上之記憐入備史官進居京尹尋復以片言而坐累
俄見謂直道以自明與修進于六官仍典司于四選遽
罹家難曲軫淵衷使璫滯至于里門賻恤特殊于等列
未畢苴麻之制忽悲弓劒之遺沐二聖之深慈矜累朝
之舊物中臺內制徊翔敢歎于積薪左轄三台忝竊但
虞于覆餗寸長靡効微罪以行蓋引年辭位者歷八九

晷露奏陳誠者章數十上始獲歸于印紱久退處于丘園仰聞龍德之升大慰海隅之望至仁溥博上下與天地同和湛恩涵濡人物暨鳥獸咸若豈圖暮景復邁盛明鼓缶酣歌方逐畋漁之樂視陰暘日已嗟鐘漏之催且鳥將死而其鳴哀天雖高而其聽邇矧懷欲報之德敢愛垂絕之音雖無補于萬分僅或能于一得伏願皇帝陛下法堯舜之修已過中高之歷年進有德以尊朝廷示敦樸以先天下延讜直則下情無壅省營繕則民

力不勞毋適宵人以防私謁之害政無作奇巧以見所
寶之惟賢若乃當太平持盈之時思既濟豫防之患志
不期于逸豫慮常懼于幾微不忘來事之師以永無疆
之譽則臣雖闔棺長夜諫弗假于陳屍瞑目九泉報猶
當于結草精誠徒切悵憤不倫臣無任

謝歷日表

臣某言今日日進奏院遞到宣勅一道伏蒙聖慈賜臣
某年歷日一卷者聖人之治歷數恭授以時下國之荷

頒宣奏行有職仰乾文而備在戴君賜以無忘臣某中
謝伏惟尊號皇帝陛下保極奉元愛民恤物功越農軒
之表慮窮象數之微前飭日卿豫推天運校諸家之疎
密審一歲之權輿氣朔推移躔離稽合杓攜魁枕固無
辰次之差日永宵中大正春秋之序屬新書之甫就欲
庶俗之周知率循舊章頒布列郡臣任叨守土職在訓
民詳觀細札之文斯蓋先天之蘊敢不朝夕從事歲時
省功勸耕于土起之辰趣務於火見之後所期遵奉無

失經常臣無任

又

臣某言欽歷授時新四方之耳目觀文察變記萬世之
章程覩細札之下頒俾列藩之寅奉仰承優渥退積兢
榮臣其中謝伏惟皇帝陛下憲天聰明稽古謨典正一
元而端本審六物以題期上承軒頊之規俯鑒羲和之
職諸家之算皆課于清臺先甲之期率循于治象隨閏
餘而消長順斗建以盈虛中朔正而歲成陰陽調而景

至導五行之和氣徧育嘉生視七宿之中星肇隆丕律
臣任叨守土職在訓民覲乾宰以敷文繹辰猷而布度
將使出作入息皆不緩于農時夕思晝行冀叅修于吏
事所期遵用無失經常臣無任

又

臣某言清臺運算將觀嗣歲之宜列郡承流猥被新書
之賜祇戴上恩之厚俯增遠守之光伏惟皇帝陛下體
乾綱之粹精總治典之纖悉奉若天道恭授人時南面

視四星之中靡差昏旦彛倫協五紀之叙備著綱條日
官方上于奏篇乙夜親紆于宸覽鉤校疎密脗合經常
會三統於一元成百年之精歲詔頒近列下逮方州臣
幸預典藩例叨寵錫竊尋時訓之紀每切農時之先夏
后小正尚記昆蟲之細呂韋月令兼推躔次之行皆所
以求陰陽之大中示耕桑之要務洪惟聖典曲盡天時
掩七歷之精微高百王之制作當官據此自識刑賞之
後先編戶見之咸知發斂之早晚臣敢不修明所職謹

視斯文露冕行春益勤勸課之業坐曹閱日不渝寒暑之期豈止閤藏以為榮遇臣無任

又

臣某言昔聖人處璣衡而欽天故日月星辰以之序象金火而治歷故氣物分數得其平蓋推步之術既精則制作之文乃定有大創革屬我聖明伏惟皇帝陛下攬商周之質文躬舜禹之歷數損益百世旦暮千齡前勅日卿鈞校諸家之疎密仰觀乾度稽叅三極之短長索

隱鈎深改差用驗盈胸于是以象見中朔不能以候移
克固信書昭示列辟乃眷官封之吏使知告朔之頒一
札十行荷甄紆于訓令九章五紀使盡識于歲年臣忝
在長人竊榮拜賜朝夕從事惟思務穡而勸功寒暑不
渝益勵首公而盡節臣無任

又

臣某言仰觀天象豫考日星之行恭授人時使知氣候
之至詔頒列郡惠浹羣生臣某中謝伏以王者稽古以

奉天順寒暑陰陽之運百姓厚生而利用在農桑衣食
之原數既合于珠躔氣遂均于玉燭伏惟皇帝陛下德
侔覆載智察幽微合三統以正一元撫五辰而凝庶績
清臺運算摠七厯以裁成方底封函遍九州而誕布臣
任叨守土職在訓民求庶政之所先案新書而盡在奉
承寶典知協紀于萬年咸與編氓趣成功于三務臣無
任

乞賜六典

臣某言伏以先唐著六官之典是為考古之書苟況稱
三代之隆不貳後王之法恭惟皇帝陛下稽若上世允
釐庶工謂開元之職儀有成周之體範因命刊讎于簡
冊又將宣布于方來凡預通閨均蒙寵錫伏念臣夙遭
際會獲齒大儒方朝廷更正于官名荷制詔對遷于階
品聖明作述親逢千載之一時臺閣規撫願識有司之
大要敢緣等比輒冒守藏所是新印唐六典欲望聖慈
特許依例宣賜臣一部庶得披覽前載習熟舊聞時亮

天工倘獲觀于衆職之治日恪位著庶自効于一官之勤臣無任

謝賜六典

臣某言奏牘之求恩寬罪戮冊書之副詔許匪頒捧縹裘以生榮刻丹衷而萃感臣某

中謝

臣聞在昔建官之

制沿革靡常開元著令之初典司尤備辨其秩序具有綱條事名雖見于當時莫遑遍舉春秋以竣于後聖茲用鑒觀恭惟皇帝陛下躬親萬務之微損益百王之際

謂成周之治典可舉而行以有唐之職儀最得其要時
書不布後學罕知命鴻都之直官定蘭臺之善本模傳
鏤版盡刊魚魯之訛宣布在廷使識雲龍之紀伏念臣
迂儒曲藝文館充員考載籍之古陳嘗聞粗畧顧朝廷
之體要莫究源流幸逢至治之期新下正名之格文階
貴品荷假寵以優遷御府新書輒抗章而自請忽拜緹
囊之賜併增經櫬之光啓發篇章雖曰一朝之制作講
求義類是皆歷代之故常足以備訪對於清閒資討論

於聖治豈其闇陋得以探詳讀三五之書自同倚相識
太平之跡竊慕劉歆矧與綴于官聯固當勤于事守仰
酬隆施誓畢微生臣無任

謝賜常平免役勅令

臣某言今日准詳定一司勅令所公文奉朝旨伏蒙
聖慈賜臣紹聖常平免役勅令一部者察俗五書總利
害康平之目任民九職盡轉移生養之宜坦然帝制之
明載在官成之法徧頒列郡下逮具僚臣某中謝伏惟

皇帝陛下祇適先猷監觀治本謂法必生於衆適而令
欲順于人心爰詔近司講修前訓視歲年之上下發斂
以時校財力之重輕有無相濟著綱條于畫一均多寡
于大中有司遵承既簡允而易守編戶賦役悉均安而
不勞炳焉垂世之謨是謂不刊之典豈期間迹與拜恩
書重念臣早以芻愚嘗聞政論暨茲退老久廢吏文恭
啓籤牒但疲精于編摘秘藏巾櫝冀傳寶于昆雲仰戴
宸慈竊深感涕臣無任

蘇魏公文集卷四十三

欽定四庫全書

蘇魏公文集卷四十四

宋 蘇頌 撰

表

賀今上皇帝登極

臣某言伏覩制書恭承皇帝陛下以正月十二日遵奉
遺制紹登寶位者中外臣民永有依賴神靈龜筮罔不
協從臣其中賀伏以太庚嗣商實兆歷年之永代邺繼

漢益開緒業之隆異世同符千齡協慶伏惟皇帝陛下
紹休洪緒眷命昊穹肇聖問于宗藩即丕圖于帝統提
五精而撫運受三策以臨尊日月正明溥乾坤而寧泰
雷雨作解徧動植以涵濡上宗七廟之基局高視百王
之徽烈臣久塵位著世荷恩榮方退老于丘園阻蹙趨
于朝闕扶杖而觀詔令繼明喜邁于重熙詒訓以示子
孫事上更期于盡瘁臣無任

賀欽聖太后同聽斷

臣某言伏審皇太后陛下勉從遺制同預政機共安龜
鼎之隆式副臣民之望凡在臣庶舉極歡欣臣某中賀
伏以皇太后陛下子育兩朝母儀萬國動必規于圖史
化實首于宮闈深居長樂之尊丕昭聖範循奉治平之
制允慰上心輔盛德于唐虞軼徽音于任姒福均宗社
恩被華夷臣限以老病退休不獲隨例稱慶闕廷臣無
任

賀立順國夫人為皇后

臣某言恭聞今日頒降麻制冊立皇后者有命自天
肇建長秋之號正位乎內實為王化之先上承廟社之
靈下副華夷之望臣某中賀竊以軒星垂象儷宸極以
居中坤德資生贊乾元而育物方交修于治典宜首正
于人倫伏惟皇帝陛下始初清明嚴恭寅畏致中和而
格天地躬禮法以御家邦媼汭嬪虞本帝舜聰明之化
塗山興夏昭大禹勤儉之風作合皇家允符世德暈珎
垂範宮闈延洪臣蒲柳衰年丘園退老側聽絲綸之出

阻陪鴛鴦之班拊蹈之誠實倍常等臣無任

謝賜登極對衣銀絹

臣某言今日潤州遞到伏蒙聖慈賜臣詔書一道寬衣五件二十五兩金腰帶一條銀器二百兩絹二百匹者大明繼照榮光徧燭于幽遐麗澤流恩繁錫遽占于耆艾奉詔文之深厚對服器以珍華拜賜不貲慙顏罔措臣其中謝伏念臣材資極陋遭遇實多以省臺累久之勤進叨近輔以蒲柳先秋之質退老丘園俯當月制

之年仰邁天飛之運顧筋骸之已瘁趨觀闕以無階方
鼓舞于休辰忽郵傳于渥命細書一札煥綸綍以下臨
束帛兼金與帶袍而共賁何言隕暮荷此恩章豈惟充
侈于家庭實亦增輝于里巷此蓋伏遇皇帝陛下堯仁
光宅周德丕承紹興洪業之隆曲軫周行之舊衣被萬
物咸均雷雨之濡惠養老臣更厚金縢之寵況餘齡之
無幾駭異數之難勝謹當鏤骨銘恩望雲祝聖出同父
老贊睿烈以無疆入戒子孫罄忠規而弗替伏限衰病

不獲奔走闕廷臣無任

又

臣某言龍飛紫極邁千載之一時鳳詔泥封均萬分之
大賚顧慚衰耄亦與匪頒煥服用以增華戒位踰而有
覲臣某中謝伏念臣斗筭小器章句陋儒逢時偶踐于
機衡引老獲歸于蓬華重明繼照徒傾日月之光輝慶
賜遂行咸蒙雨露之潤澤爛然龜紫之飾副以兼金之
繁寵迨立園榮生里閭此蓋伏遇皇太后陛下謀定國

體功勤王家推惠養以為心致中和而育物博施濟衆
務開廣于堯仁承筐是將俾涵濡于周澤綬章若若幣
帛幾幾暮齒何堪拜君命之再至丹誠深切瞻象魏之
九重伏限衰羸不獲躬詣朝闕臣無任

賀元符三年生皇子

臣某言前星發采占垂象之告符甲觀誕彌協吹銅之
夙兆況坤儀之正位當震長之鴻名事越古今慶覃夷
夏臣某中賀伏惟皇帝陛下體元居正恭已承祧自光

宅于皇基思克隆于治道振淹起廢朝野益見于清明
隕祉發祥天人動彰于丕應月直正陽之吉時生貳極
之尊國本維寧允契元良之美民黎均惠咸蒙在宥之
恩臣退老江圻欣聆邦慶手足徒知于蹈扞筋骸難強
于奔趨企仰雲霄但馳覓幹臣無任

又

臣某言前星發采占垂象之告符甲觀誕彌協吹銅之
夙兆况坤儀之正位當震長之鴻名事越古今慶覃夷

夏臣其中賀伏惟皇太后陛下母臨萬國子育羣生翊
嗣聖之丕基贊皇圖之興運自家刑國中外之治晏然
隤祉發祥天人之應昭若月直正陽之吉時生貳極之
尊國本維寧允契元良之美民黎均惠咸蒙在宥之恩
臣退老江圻欣聆邦慶手足徒知于蹈抃筋骸難強于
奔趨企仰雲霄但馳鳧幹臣無任

賀受傳國璽

臣某言伏聞五月日皇帝御大慶殿受傳國寶者天開

炎統受命冠于百王神啓坤珍得寶充于八璽自秦咸
之吉壤奉螭王之嘉祥茂對元符考稽故實舉正元五
月之會親見臣工推渙汗大號之恩普周方域慶成盛
禮歡浹輿情伏惟皇帝陛下題五精之期繼六聖之治
積德累仁而動植茂遂彰善癉惡而朝野清明德澤誕
敷瑞應沓至惟傳國之守器蓋歷代之徽章監璧斯書
篆刻久藏于厚載漢泉堅并靈光屢見于前朝由神物
之護持豈人力之能致聖辰奉若天意昭然既壽永昌

方詠歌于金石無思不服將龍言震于獫狁見海內一家
之榮昭帝者萬世之福臣抱痾暮齒得謝明時側聽句
臚竊欣盛德之事躬與芸牧共贊泰平之功臣限以老
疾在遠不獲躬慶闕廷臣無任

進華戎魯衛信錄

臣某言臣聞先王撫邦弼成六服天子有道守在四夷
大禹之即叙西戎周人之惠綏中國由聲明之及遠致
華裔以同風詩書所稱古今一揆臣其中謝竊以國家

規恢億載之策方制萬里之區憬彼獫狁初擅權於八部屬在唐季遂竊據于一隅太祖皇帝首命帥臣經營其畧太宗皇帝載馳使指問遺有加雖服叛之靡常亦羈縻而不絕爰逮文明之世親巡澶魏之師因一介之請和賜勅書而示好仁宗再更信誓益以金繒之資英宗嘗勅邊州寬其魚葦之禁以繼好息民之義為長轡遠馭之圖相承百年共由一道伏惟皇帝陛下德寓天覆乾剛日新紹列聖之成謨總君人之大畧謂彼方之

荒忽狃我澤之涵濡歲講聘儀雖切蟻羶之慕間窺邊
隙稍萌蛆食之心上靡察淵俯為全度科征暫起則戒
彼創生疆畛交侵則許其分畫蠕蠢咸蒙於煦育垢滂
悉為之含容宜其革心永以內面竊尋在昔禦戎之論
前書載筆之傳或厚賂和親漢才得其下策或償功與
地唐亦信而不疑事出權宜情非固結由至誠之不著
終後悔之莫追是以匈奴未入於長城而馬邑之謀已
露結贊始盟于渭水而平涼之變遽聞亂之由生兵乃

弗戢豈若我朝之綏遠率令異域之歸忠偃革有年曠
古無並而聖慮猶虞其越軼詔書思所以持循乃屬下
臣討求故實料平日嘗行之務著一朝永久之規將欲
付之有司使知所守又以待其來者無得而踰極遠見
識微之明得禦侮折衝之要臣謬持鉛摘躬服綸函采
輜軒絕代之言紀象胥行人之職撮其綱目刪彼繁蕪
發例求端首述講修之始分門布序次標書幣之儀軺
車別常泛之名陞見異燕辭之目至于勞賓訝摯厚往

薄來朝廷之匪頒州郡之迎餞皇華四達山川有險易之塗關市交通貨賄有懋遷之利內則羣臣之策應外則旁境之文移諸蕃之土俗風宜近塞之溝封亭隧有資援據悉用條陳或見聞于異辭或圖上于方畧推原本末則大事小事而俱收蒐補闕遺則中書外書而雜取歲時洊易籤帙甫終解成周王會之篇因為憲令繪湘東貢職之事匪獨形容方屬藁之上聞荷賜名之下貴恭覽天題之命仰探聖蹟之淵曰華戎所以示南北

之情通曰魯衛所以表親鄰之意厚信者久而不易錄
者盡而不汙兼三義以名篇掩二中之善志謙抑冠百
王之表威懷盡四海之歡是謂信書煥乎國冊臣荒孱
有素紬繹無功識謝營平罔通知於夷事學慚伯始幸
纂續于漢儀固多䟽梧之尤莫盡聖神之蘊將塵乙覽
豫集汗顏冒瀆冕旒臣無任

謝支賜

臣今日准樞密院劄子以臣近上表進呈華戎魯衛

信錄二百二十九卷事目五卷奉聖旨特賜銀絹各一百五十兩匹者輯百年之案籍甫上奏篇出九府之貨財猥加庶錫顧編摩之效薄荷獎飾之恩隆捧對以還兢惶靡措伏念臣技能素寡識致甚迂早探六藝之科未達四方之畧昨承詔旨俾詮次于信書歷考前聞僅裁成於類例叙異域講和之事雜鴻臚典客之儀規撫悉稟于淵衷論著漫殫于庸力汗青云畢漏目固多但虞稽誤之誅敢覲便蕃之賜伏況撫和戎狄本聖世之

治功紬繹簡編乃文儒之常職詎謂偶緣于任使遂蒙
推假于寵光賚物有加揆勞非稱雖忍慚而祇受終撫
事以增憂此蓋伏遇皇帝陛下天覆萬邦澤流四海以
威懷御蕃國以恩信禮使人率用舊章垂為永制尸臣
無狀乏纖塵涓露之功賞典過優厚賁繅金之品既
被匪頒之渥益思報稱之宜惟竭力于股肱冀收功于
簿領仰酬樂育誓畢餘生臣無任

進元祐編勅

臣某言竊以法不獨立必由聖哲之有為令出惟行當重變更之所始時屬休明之運民漸寬厚之仁仰奉淵謨克新治典臣等聞古者民樸而事約故弼教之刑流宥惟五及乎俗易而風移故用中之典輕重以三事隨世而屢遷文因情而互起自唐興訖乎顯德其律令格式具載于簡編由國初至于元豐其制勅禮書悉藏于官守章程時易巧偽日新峻其隄防乃有滋彰之弊緩其銜策又多抵冒之虞昔為便者或閔于今近所利者

或違於遠舊文未具新例更生令每戒于茶煩事固難
于毛舉取其宜於時者由是變而通之或革或因至纖
至悉恭惟皇帝陛下太皇太后陛下道熙天緯智燭物
情紹休六紀之光損益百王之際以謂疏律著令皆欲
傳之無窮正本清源遂可措而不用雖祖宗之制具在
而習俗之變靡常正律旁章一有滯疑之論奇請他比
寢成破析之繁不有刊刪孰從折中宜乎本朝以為先
務二聖為之盡心慎簡乃僚總領其事置司率屬將訂

正於煩苛據舊鑒新俾發明于義類臣等奉承詔旨緝閱舊章于是以元豐勅令格式并元祐二年十二月終以前海行續降條貫共六千八百七十六道兼取嘉祐熙寧編勅附令勅等講求本末詳究源流合二紀之所行約三書之大要彌年擿撫極慮研窮稍就編騰粗成綱領隨卷標目用舊制也以義名篇倣唐律也其間一事之禁而有數條一條之中或該數事悉皆類聚各附本門義欲著明理宜增損文有重覆者削除之意有闕

略者潤色之使簡而易從則久而無弊又案熙寧以前
編勅各分門目以類相從約束賞刑本條具載以是官
司便于檢閱元豐勅則各隨其罪釐入諸篇以約束為
令刑名為勅酬賞為格更不分門故檢用之際多致漏
落今則並依熙寧以前體例刪修更不別立賞格又以
古之議刑必詢于衆漢以春秋斷疑獄發自仲舒唐以
居作代肉刑成於洪獻復有國人奏請隨事立條讞報
實繁去取尤慎曩時修熙寧勅止據嘉祐舊文元豐勅

亦只用熙寧前例增損刪定更不參考日前創法改作之意今則斷自嘉祐至今凡二十餘年海行宣勅及四方士陳述利害叅酌可否互有從違又以人情多辟法意未周須藉增裨乃為完密考東郡之議應劭有臣所創造之言按慶厯之書羣官有叅詳新立之例今來勅令式內事有未備與刪定官等同共討論具為條目者即依慶厯故事注曰臣等叅詳新立又以法令所載事非一端郡縣省臺紀綱繁委前紀所述皆有別書魏律

則尚書州郡著令自殊唐格則留司散頒立名亦異皆
所以便于典掌不使混殽其元豐勅以熙寧勅令中合
入尚書六曹在京通用并一路一州一縣事並釐歸逐
處若盡收還慮致叢脞今只以該五路以上者依舊修
入勅令其餘有事節相須條制相類可以隨事生文不
須別條立法者雖止該一路一司並附本條編載又有
專為一事特立新書若景德農田慶厯貢舉皆別為條
勅付在逐司今元祐差役勅先已成書并近歲專為貢

舉出使立條者既不常行遇事即用並已釐出不使相
參其有一時約束三省奉行廢置改更蠲除省約既闕
治體須俟僉用大則奏稟于清衷次則諮議于執政既
有定論咸用著篇又案刑統錄出律內餘條准此附名
例後旁舉諸條各以類見今亦以勅令中如此例者六
十四件別為一篇凡刪修成勅二千四百四十條共一
十二卷內有名件多者分為上下計一十七卷目錄三
卷令一千二十條共二十五卷式一百二十七條共六

卷令式目錄二卷申明一卷餘條准此例一卷元豐七年以後赦書德音一卷總五十六卷合為一部如得允當即望降勅雕印頒行仍乞以元祐詳定令式為名所有元豐勅令格式并元祐二年終以前海行續降條貫及前來詳定重修編勅所關出熙寧勅天聖令附令勅并熙寧元豐申明勅前後申明散勅及一時指揮等已降新書收載者更不行用不係收載者各合依舊法其元祐三年正月一日以後海行續降條貫自為後勅施

行若乃勅著罪名令存禁止應干典則盡載式文世重
世輕蓋亦隨時之義先庚先甲庶乎已日乃孚倘賜俞
音立為常制則官司奉憲無穿令斷律之譏郡國承流
有操刀執繩之戒臣等昧刑名之學乏將明之才誤被
選掄服勤紬繹惕緩期于歲月愧無補于毫分所冀刑
清吏端少助敦龐之化網疎禁闊彌彰宏遠之規塵瀆
冕旒若蹈淵谷其勅令式等五十六卷并看詳二百卷
共二百四十六冊謹隨表上進

蘇魏公文集卷四十四